



Här Fernand Etgen
President vun der Chamber

Lëtzebuerg, den 31 Mee 2022

Här President,

Esou ewéi den Artikel 80 vum Chambersreglement et virgesäit, biede mir Iech, dës parlamentaresch Fro iwwert Héichwaasser vum Juli 2021 un Madamm Inneminister, den Här Minister fir Mëttelstand an d'Madamm Minister fir Famill an Integratioun weiderzeleeden.

D'Héichwaasserkatastroph am Juli lescht Joer huet a verschiddene Géigende vum Land extrem Schied hannerlooss vun deem esouwuel Privatleit, Baueren, Geschäftsleit an och Gemenge betraff waren. An den Äntwerten op d'parlamentaresch Ufroen n°5691 a n°6008 huet d'Regierung erkläert, dass finanziell Hëllef vum 100.000.000€ un d'Affer ausbezuelte sollte ginn. Laut engem Artikel op *wort.lu* ware bis Mëtt Mäerz awer eréischt 12 Milliounen ausbezuelte ginn. An engem weideren Artikel aus dem *Wort* vum 28. Mee 2022 ass ze liesen, dass verschidden Affer awer bis haut, trotz Zousoen, keng finanziell Ënnerstëtzung kritt hunn. Dës Aussoen hu mir och vu Privat- a Geschäftsleit sou wéi vun de Gemengeresponsabelen héieren.

An dësem Kontext géife mir gär folgend Froen un d'Regierung riichten:

- Kann d'Regierung dës Informatioun bestätegen?
- Wa jo, wat sinn d'Grënn fir net bezuelte Hëllef? Ginn dës Hëllef nach ausbezuelte?
- Wa jo - bis wéini gedenkt d'Regierung, dës Hëllef ze bezuelen?

Här President, mir bieden Iech eisen déifste Respekt unzehuelen.

Max Hengel

Léon Gloden

Deputéiert

Octavie Modert



Réponse de Madame la Ministre de l'Intérieur, Taina Bofferding, de Madame la Ministre de la Famille et de l'Intégration, Corinne Cahen, et de Monsieur le Ministre des Classes moyennes, Lex Delles, à la question parlementaire n°6276 des honorables députés Octavie Modert, Max Hengel et Léon Gloden concernant les aides suite aux inondations du mois de juillet 2021

Privatleit

Wat d'Hëllef fir déi vun den Iwwerschwemmunge vum 14. a 15. Juli 2021 concernéiert Privatleit betrëfft, goufe 664 Demandë fir eng finanziell Ënnerstëtzung beim Familljeministère um Datum vum 13. Juni 2022 agereecht. Dovunner huet de Familljeministère bis ewell 598 Demanden ofgeschloss, dat heescht knapp 90 % vun den Dossiere goufen traitéiert, an et goufen Hëllef an Héicht vu 7.162.511€ u Privatleit ausbezuelet.

Domadder stinn nach 66 Dossiere beim Familljeministère op, well d'Leit déi néideg Dokumenter nach net agereecht hunn, fir den Dossier ze complétéieren (zum Beispill d'Äntwert vun der Assurance, d'Preuve vun de Revenuen oder – am Fall vu Residenzen – eng Opdeelung vun de Käschten). Soubal en Dossier komplett ass, kann de Familljeministère dësen un d'Kommissioun weiderginn (*Commission des secours sociaux demandés à la suite de catastrophes naturelles*), fir en ofzeschléissen.

Gemengesecteur

Wat de Gemengesecteur betrëfft, goufe Schied an Héicht vun 21.186.810,71€ gemellt. Den Inneministère huet bis de 16. Juni 2022 32 Demandë vu Gemengen erakritt an eng vun engem Syndikat. Op den Dag vum 16. Juni 2022 si 7 Gemengen an 1 Syndikat fir insgesamt 1.372.987,48€ entschiedegt ginn.

Et sinn nach 24 Dossiere vu Gemengen en cours, well och hei d'Dossieren entweder net komplett sinn oder déi néideg Piècë feelen, fir z'analyséieren, ob déi Schied eligibel fir e Remboursement sinn oder net. Déi ausstoend Dossiere belafen sech op eng Zomm vu 19.824.062,42€. D'Gemengen an d'Syndikater kënnen hir Demande nach bis den 1. Juli 2022 areechechen.

Betribler

Säitens der Generaldirektioun fir de Mëttelstand sinn nëmmen déi Dossieren nach net integral ausbezuelet ginn, an deenen nach Dokumenter feelen an deemno d'Demande nach net komplett ass. Sou wéi an der Äntwert op d'parlamentaresch Fro 5101 preziséiert ginn ass, sinn d'Grënn déi, dass entweder keng Expertise vum Assureur oder keng Rechnunge virleien. An deene besote Fäll sinn awer ëmmer Avancen ausbezuelet ginn, an de Solde gëtt liquidéiert, soubal déi erfuerdert Dokumenter virleien.

Lëtzebuerg, de 22/06/2022.
D'Inneministesch
(s.) Taina Bofferding